

Allannguutissatut siunnersuut

uunga

**Siunnersuut: Meeqqat illersuisuat aamma Meeqqat pillugit siunnersuisoqatigiit pillugit Inatsisartut inatsisissaattut siunnersuut, normua aamma ullua**

Aappassaaneerneqarnissaanut Naalakkersuisut saqqummiussaat.

§ 4-mut

1. § 4, imm. 3, nr. 3, atorunnaarsinneqassaaq.

*Nr. 4 matuma kingorna nr. 3-nngorpoq.*

2. § 4, imm. 3, nr. 4-mi ”6” allanngortinneqassaaq, ”5”-nngortillugu.

§ 5-imut

3. § 5, imm. 2, imatut oqaasertalerneqassaaq:

”Meeqqat pillugit siunnersuisoqatigiit 7-inik ilaasortaqaassapput. Taakkunannga Naalakkersuisut ilaasortat 6-it toqqassavaat, §5, imm. 1, 3 aamma 4 aamma § 6, kiisalu Meeqqat illersuisuat toqqassallugu, tak. § 4.”

§ 7-imut

4. § 7, imm. 1, nr. 3, atorunnaarsinneqassaaq.

*Nr. 4 matuma kingorna nr. 3-nngorpoq.*

Siunnersuummut oqaaseqaatit

**Oqaaseqaatit nalinginnaasut**

Inatsisartut inatsisissaattut siunnersuutit allannguutissatut siunnersuutigineqarneranut tunngaviupput Ilaqutariinnermut peqqissutsimullu siunnersuutit aappassaanneerneqarnissaanut isumaliutissiissusiornermini oqaasertaliussimasaat.

Naalakkersuisut Ilaqutariinnermut peqqissutsimullu ataatsimiititaliaq isumaqatigaat nalilermassuk § 4, imm. 3, nr. 3 atorunnaarsinneqartariaqartoq, tamatuma kingorna Meeqqat illersuisuat soraarsinneqarsinnaavoq, Meeqqat illersuisuat timimigut tarnimigulluunniit napparsimalernini pissutigalugu Inatsisartut inatsisissaanni suliassatut allattorneqartut suliarisinnaajunnaarunigit.

Naalakkersuisut aamma Ilaqutariinnermut peqqissutsimullu ataatsimiititaliaq isumaqatigaat § 7, imm.1, nr. 3 atorunnaarsinneqassasoq, tamatuma kingorna Meeqqat pillugit siunnersuisoqatigiinni ilaasorta q soraarsinneqarsinnaasoq timimigut tarnimigulluunniit napparsimalernini pissutigalugu Inatsisartut inatsisissaanni suliassatut allattorneqartut suliarisinnaajunnaarunigit.

Tassunga tunngatillugu oqaatigineqassaaq Meeqqat pillugit siunnersuisoqatigiit Meeqqat illersuisuat aamma Meeqqat pillugit siunnersuisoqatigiit ilaasortaasa ilaat soraarsinneqarsinnaasut § 4, imm. 3, nr. 4 (maanna 3-usoq) aamma § 7, imm. 1, nr. 4 (maanna nr. 3-usoq), ilaasortat ilaat amerlanerussuteqartut isumaqatigiippata, tak. aalajangersakkat aatsaannguaq taaneqartut.

Naalakkersuisut aamma Ilaqutariinnermut peqqissutsimullu ataatsimiititaliaq isumaqatigaat isumaqarmata inatsisip oqaasertaani erseqqissumik allassimasariaqartoq Meeqqat pillugit siunnersuisoqatigiit katillugit 7-inik ilaasorta qartut.

Naggataatigut Naalakkersuisut isumaqataaffigaat Meeqqat pillugit siunnersuisoqatigiit Meeqqat illersuisuat soraarsissinnaagaat Meeqqat pillugit siunnersuisoqatigiit ilaasortaasa ikinnerpaamik 5-iusut soraarsitsinissaq akuerseqataaffigippassuk. Naalakkersuisut isumaqarput ilaasortat 5-it amerlassusaat naammattoq Meeqqat illersuisuannik soraarsitsinissamut, taamatummi amerlassuseqartut aalajangernerat peqataassammat meeqqat pisinnaatitaaffii pillugit suliffimmi eqqissisimanissamut kiisalu suliffimmi toqqissimasoqarnissaanut, aammalu Meeqqat illersuisuannik soraarsitsinissamik piffissaanngitsuni isummeqattaartoqannginniassammat.

### **Allanguutissatut siunnersuutip allaffissornikkut kingunissai**

Allanguutissatut siunnersuut allaffissornikkut kinguneqassanngilaq.

### **Allanguutissatut siunnersuutip aningasaqarnikkut kingunissai**

Allanguutissatut siunnersuut aningasaqarnikkut kinguneqassanngilaq.

## **Aalajangersakkanut ataasiakkaanut oqaaseqaatit**

### *Nr. 1-imut*

Inatsisartut inatsisissaatut siunnersuummi § 4, imm. 3, nr. 3 aalajangersagaqarpoq Meeqqat illersuisuat ukiut pingasut iluanni soraarsinneqarsinnaasoq timimigut tarnimigulluunniit napparsimalernermigut Inatsisartut inatsisaanni suliassatut allatorneqarsimasut sularisinnaajunnaarsimagunigit. Aamma aalajangersarneqarpoq Meeqqat illersuisuat Naalackersuisut qinnutiginninnerat tunngavigalugu napparsimanermut nakorsamit allagartamik pissarsiniartariaqartoq.

Allanguutissatut siunnersuutip malitsigisanik § 4, imm. 3. nr. 3 atorunnaarsinneqarpoq.

§ 4, imm. 3, nr. 3-p atorunnaarsinneqarnerata malitsigisaanik § 4, imm. 3, nr. 4, allangorpoq imaalilluni: § 4, imm. 3, nr. 3.

### *Nr. 2-mut*

Inatsisartut inatsisissaattut siunnersuummi § 4, imm. 3, nr. 4 malillugu Meeqqat illersuisuat ukiut pingasut iluanni Naalackersuisunit soraarsinnaagaat, Meeqqat pillugit siunnersuisoqatigiit ilaasortaasa 6-it soraarsitsinissaq innersuussutigippassuk, aamma Naalackersuisut pissutsinik misissueqqisaareernerminni Meeqqat illersuisuannik soraarsitsinissaq pisariaqartutut isigippassuk.

Allanguutissatut siunnersuutip malitsigissavaa, Meeqqat pillugit siunnersuisoqatigiit ilaasortaat isumaqatigiittussat 6-iniit 5-iinangornissaat.

### *Nr. 3-mut*

Inatsisartut inatsisissaattut siunnersuummi § 5, imm. 2 aalajangersaavoq Meeqqat pillugit siunnersuisoqatigiit 6-inik ilaasortaqaassasoq Meeqqat illersuisuat 7-iliullugu. Ingerlaqqilluni aalajangersagaqarpoq ilaasortat Naalackersuisunit toqqarneqassasut, tak. § 6.

Allanguutissatut siunnersuutip kingunerissavaa aalajangersakkap erseqqinnerulernera, tassa Meeqqat pillugit siunnersuisoqatigiit 7-inik ilaasortaqaassasut, taakkunanga 6-it

Naalakkersuisunit toqqarneqassallutik, tak. § 5, imm. 1, 3 aamma 4 aamma § 6, aammalu Meeqqat illersuisuat toqqassallugu, tak. § 4.

*Nr. 4-mut*

Inatsisartut inatsisissaattut siunnersuummi § 7, imm. 1, nr. 3 aalajangersaavoq Meeqqat pillugit siunnersuisoqatigiinni ilaasortaq ataaseq ukiut pingasut iluanni Naalakkersuisut soraarsissinnaagaat, timimigut tarnimigulluunnit napparsimalernermigut Inatsisartut inatsisaanni suliassatut allattorneqarsimasut sularisinnaajunnaarsimagunigit. Aamma aalajangersarneqarpoq Naalakkersuisut qinnutiginninnerat tunngavigalugu napparsimanermut nakorsamit allagartamik pissarsiniartariaqartoq.

Allanguutissatut siunnersuutip kingunerisaanik § 7, imm. 1, nr. 3 atorunnaarsinneqarpoq.

§ 7, imm. 1, nr. 3-p atorunnaarsinneqarnerata kingunerisaanik § 7, imm. 1, nr. 4 allanngortinneqarpoq § 7, imm. 1, nr. 3-nngorluni.